




Ladinia

Da 39 a 100 ëura de televizion ladina

La Provinzia de Bulsan s'èurantol l'finanziamënt dla trasmiscions de men-dranza dla RAI de Bulsan y a chësta maniera puderan udëi plu demo n tan de televizion tla rujeneda ladina. **L aumënt da 39 a 100 ëura de televizion al ann** ie unì mparti te na segonda edizion de Trail plu longia y de plu trasmiscions cultureles "Paladina" y "Bancorin". Tres la convenzion nueva danter Stat, Provinzia y RAI vëniel nce garantì plu autonomia ala redazion ladina.

Tres l'mpëni y finanziamënt da pert dla Provinzia puderan udëi doi iedesc al di la nutizies tla rujeneda ladina. S'èuraprò al'edizion dala 19.55 ne n uniral mo fat na segonda che va dala 22.00 nchin ala 22.10, y chësc dal lunesc ala sada. N aumënt saral nce pra trasmiscions cultureles, che n puderà udëi n segondo iede al'ena: s'èuraprò ala juebia nce de merdi, for dala 20.50. La trasmiscion plu longia "Bancorin" sarà de udëi l'ultimo mierculdi dl mëns, dala 20.50 nchin la 21.20. De ndut fej la trasmiscions s'èuraprò ora n **aumënt de 156%** dl tèmp de televizion ladina.



L aumënt de ëures de trasmiscion tla rujeneda ladina ie un di resultat dla convenzion nueva danter la Provinzia de Bulsan, l'Stat talian y la RAI. Per l'prim iede s'èurantol la Provinzia l'finanziamënt dla produzion y trasmiscion de cuntenuc per tudësch y ladin. Aldò de n'acurdanza che vel trëi ani, paia la Provinzia nchin al 2015, **20 milion de euro** al ann. Per na mendranza de rujeneda ie propi la rujeneda la rejon de vester. Te chëla che l'ladin unirà adurvà mo de plu tla televizion juda chësc pro a

nes sentì mo de plu cumenanza ladina. La rujeneda possa me se svilupé sce la vën adurveda y audida truep.

N segondo var mpurtant che vën a se l'dé cun la convenzion nueva ie la garanzia de **autonomia** per la redazion ladina. Per l'prim iede arà la redazion ladina nstëssa n respunsabl y ne sarà nia plu dependënta da n scef d'otra rujeneda. A chësta maniera vën la redazion ladina recunesciuda al medemo nivel sciche la redazions dl'otra rujenedes.